

Preschentaziun d'in roman criminal rumantsch

■ (cp) La Chasa Editura Rumantscha preschenta ses cudesch nov «Hannes», in roman criminal dad Oscar Peer. En la sparta da crimis cumparan plitost darar cudeschs rumantschs; tant pli legraivla è questa publicaziun. Peer tschaffa da l'entschatta davent il lectur cun sia ovra: Hannes Monstein turna enavos d'in via-di e chatta sia dunna e ses fraster morts en sia abitaziun. Las inquisiziuns da la polizia cumenzan, plaun a plaun intervegn ins dapli da las persunas pertugadas e da lur tschertgel d'amis... ed i resta captivant fin l'ultima pagina!

Quest ultim cudesch dad Ocar Peer (1928–2013) vegn preschentà la mesemna, ils 28 da matg 2014 a las 19.00 en la Café-Bar dal Teater Cuir.

La prelecziun vegn fatga dad *Arnold Rauch*. In accompagnament musical porschan *Risch Biert* (clavazin) ed *Elisabeth Trachslin* (ghitara).

L'entrada è libra.

BETLEHEM

Papa Francestg pretenda la pasch en il Proxim Orient

(rtr) Papa *Francestg* ha pretendì a Betlehem ina fin dal conflict en il Proxim Orient ed ina soluziun da dus stadis. I saja uras da terminar questa situaziun che vegnia adina pli insupportabla, quai ha el ditg durant in inscunter cun il president palestinais *Mahmud Abbas*.

Tut ils pertugads stoppian avair il curaschi per la pasch, ina pasch che sa basia sin il dretg da dus stadis, nua ch'ins possa viver ed exister en pasch e segirtad ed entaifer cunfins renconuschids internaziunalmain.

Papa envida ad in inscunter per urar

Papa Francestg ha plinavant envida il president israelian, *Shimon Peres*, ed il president dals Palestinais, *Mahmund Abbas*, ad in inscunter communabel per urar per la pasch. El mettia a disposiziun il Vatican persuerter.

Entant han ils dus presidents acceptà l'invit da papa Francestg. L'inscunter duai esser il zercladur.

Novs radars meteorologics per la Svizra

■ (cp) L'Uffizi federal da meteorologia e climatologia **MeteoSvizra** prendi dacurt en funcziun ses nov radar meteorologic sin la **Pointe de la Plaine Morte (2900 m s. m.)** en il chantun Vallais. Questa quarta apparatura cumplettescha optimalmain la rait da radars svizzers e pussibilitescha en l'avegnir da registrar meglier las precipitaziuns en las regiuns interalpinas. Plinavant ha l'Uffizi federal per edifizis e logistica (Ufel) cumenzà dapi dacurt – per incumbensa da **MeteoSvizra** – cun bajegiar il tschintgavel radar meteorologic da la nova generaziun sin il **Piz Weissfluh** en il chantun Grischun.

L'Uffizi federal da meteorologia e climatologia **MeteoSvizra** ha l'incarica legala da survegliar l'andament da l'aura en Svizra e d'avertir en cas da privels da la populaziun, las autoritads sco er diversas organisaziuns. Per quest servetsch naziunal da meteorologia e climatologia vegnan en funcziun ils radars meteorologics. Cun agid da las datas da radar èsi numnadamain pussaivel da far previsiuns a curta vista da precipitaziuns, urizis e tempestas. Quai è d'impurtanza centrala per far frunt a privels da la natira sco auas grondas, che pon avair consequenzas dramaticas surtut per las regiuns muntagnardas. Il maletg-radar da la Svizra sa resultava dals maletgs da las trais staziuns da radar da **MeteoSvizra** ch'èn localisadas sin l'Albis sper Turitg, sin il Monte Lema sper Lugano e sin La Dôle sper Geneva. Quels trais indrizs da radar na tanschan dentant betg per predir exactamain las precipitaziuns en il Vallais central ed en il Grischun. Las muntognas autas disturban per part ils signals dals trais radars meteorologics existents.

Avertura dal radar meteorologic en il Vallais

Dacurt è vegnì mess en funcziun il radar en il chantun Vallais sin la **Pointe de la Plaine Morte**. L'integrasiun dal quart radar en la rait svizra vegn a meglierar la previsiun da las precipitaziuns e l'avertiment da stemprads ed urizis sco er d'inundaziuns en il territori interalpin. En pli èsi en l'avegnir er pussaivel da cumpensar bain l'eventuala interrupziun d'in indriz e da garantir ina rait efficazia. Il maletg-radar da la Svizra sa resulta danovamain dals maletgs da las quatter sta-



Radar d'aura da **MeteoSchweiz** **Pointe de la Plaine Morte (VS)**.

FOTOS MAD

ziuns da radar da **MeteoSvizra** e dat infurmaziuns precisas davart las precipitaziuns en Svizra e quai durant 24 uras a di.

Cumenzament da las lavurs da construcziun sin il Piz Weissfluh

L'Uffizi federal per edifizis e logistica (Ufel) ha cumenzà – per incumbensa da **MeteoSvizra** – cun las lavurs vi dal tschintgavel indriz da radar sin il **Piz Weissfluh** (territori da la vischnanca da Langwies/Arosa). Las lavurs sin il piazzal pretensius sin 2843 meters sur mar vegnan presumadamain a durar duas stadis. La lavur da fundament vegn ad esser terminada vers la fin matg 2014. Alura suondan las lavurs da betun cun il fundament per la tur da radar, las construcziuns d'interiurs e per finir vegn il sistem da radar installà. A partir da l'atun 2016 duai il nov indriz da radar emetter emprimas datas.

Prognosas da l'aura ed avertiments d'urizis optimads


La rait da radar da **MeteoSvizra** furnescha 24 uras a di en temp real maletgs detagliads da l'entira Svizra davart plievgia, naiv e granella. Betg sulettamain per il servetsch naziunal **MeteoSvizra**, mabain er per ils servetschs meteorologics privats èn quests maletgs ina premissa irrenunziabla per avertir d'urizis e far prognosas

da l'aura. Plinavant nizzegian diversas branschas las datas da radar sco per exempel l'aviatica, assicuranzas, protecziun cunter aua gronda e la scienza.

Ulteriuras infurmaziuns:
– Maletg-radar actual da las precipitaziuns:
<http://www.meteoschweiz.admin.ch/web/de/w>

[etter/aktuelles_wetter/radarbild.html](http://www.meteoschweiz.admin.ch/web/de/wetter/aktuelles_wetter/radarbild.html)
– Infurmaziuns davart il project **Rad4Alp**:
http://www.meteoschweiz.admin.ch/web/de/klima/messsysteme/atmosphaere/radar/projekt_rad4alp.html

– Infurmaziuns davart **MeteoSvizra**:
<http://www.meteoschweiz.admin.ch/web/de/html>



Fotomontascha dal nov indriz da radar meteorologic sin il **Piz Weissfluh (GR)**.



FOTO S. ROTHMUND

*In di senza tei - e biars vegnan a suandar.
In patratg vid tei - ed ei vegnan ad esser numerus.
Maletgs, muments, sentiments,
Els vegnan adina puspei a regurdar nus vid tei,
a legar nus e mai schar emblidar nus tei.*



Annunzia da mort

Nies scaffider e gidonter, ha priu per bien da clamar ord questa veta miu car mariu, nies car bab, tat, frar, quinau, aug e padrin

Peter Leonard Tenner – Schnoz

(9 da fenadur 1930 – 23 da matg 2014)

Il Segner ha liberau il defunct dils mals terresters e nus fidein alla nuviala pascala nua ch'el retscheiva siu survient tier el ella patria celestia senza cruschs e mals.

Nus recumandein il defunct a Vossa oraziun.

- S'uni cun il car defunct:
- Felicia Tenner – Schnoz, consorta
- Rita Huonder – Tenner e Corsin cun Remo ed Ursin
- Leonard Tenner – Guinacaran ed April cun Jelo e Patricia Svetlana
- Florentin Tenner – Gysin e Noëlle cun Manuel, Fabio e Marco
- Giuliana Huonder – Tenner e famiglia, Mustér
- Clotilda Tenner, Mustér
- Battesta Tenner – Schnoz e famiglia, Segnas
- Rita Cavegn – Tenner e famiglia, Camischolas
- sco era en num dils auters parents.

La sepultura ha liug gliendisdis proxim, ils 26 da matg 2014 allas 14.00 uras ella baselgia parochiala s. Gions a Mustér.